



**JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIAL**

Komunikadu Imprensa

**Periodu : Juñu 2011
Publikasaun : 25 Juñu 2011**

JSMP Kontinua Hala'ó Treinamentu ba Lider Komunitaria no Estudante Iha Distritu Covalima no Distritu Bobonaro

Iha loron 21 no 24 fulan Juñu 2011, JSMP liu husi Unidade Asistensia Legál ba Vítima (VSS) realiza treinamentu ba lider komunitaria iha suku Fohorem Vila, Sub Distritu Fohorem, Distritu Covalima. Aliende ne'e, treinamentu ba asuntu hanesan hala'ó mos ba estudantes Eskola Secundaria Katolika Colegio Infatri de Sagres Maliana.

Materia treinamentu ne'e inklui Kódigu Penál no Kódigu Prosesu Penál husi perspektiva vítima violénsia bázeia ba jéneru, Lei Kontra Violénsia Doméstika inklui mós padraun internasionál balun ne'ebé mak Timór Léste opta tiha ona.

Diretór Ezekutivu JSMP, Luis de Oliveira Sampaio haktuir katak, *treinamentu importante tebes ba autoridade komunitariu no estudante sira atu partisipa ativivu iha prosesu dezemvolve no hametin setór jutisa iha Timór Léste.*

Liu tan nia subliña katak setór justisa tenke hatu'ur hanesan obra koletivu, obra sociedade ka obra ema hotu nian. Elemenetu hot-hotu iha nasaun ida ne'e iha obrigasaun no responsabilidade hanesan atu hametin sistema judisiariu Timór Léste. Hanesan JSMP afirma bebeik ona katak setór justisa partensia ba ema hotu nian, tanbá ne'e treinamentu ne'e nu'udar meus ida atu mobiliza apoiu publik liu husi hasae kapasidade no koñesimentu autoridade xave sira iha setór refere.

.Aliende ne'e, nia mós hatutan tan katak programa treinamentu ne'e hanesan pasu ida importante hodi aktualiza no dizamina informasaun liu-liu ba lideransa komunitária hodi kontribui ba prosesu prevensaun ka eliminaun violénsia bázeia ba jéneru ne'ebé mak as iha Timór Léste.

Prosesu treinamentu ne'e hala'ó ho maneira diskusaun nakloke hodi involve partisipantes sira iha prosesu laran. Treinamentu hahu ho apresentasaun ba materi husi fasilitador, hafoin fahe partisipantes sira ba grupu diskusaun atu nune'é partisipantes sira bele identifika hahalok saida maka konstitui nu'udar krime violénsia doméstika inklui sansaun ne'ebé regula iha kódigu penál.

Treinamentu ne'e apresenta ho metudu ezersisiu no simulasaun prosesu julgamentu iha tribunal hodi fasilita partisipantes sira nia koñesimentu no kumpriensaun konabá julgamentu iha tribunál liu-liu ba kazu krime, hodi nune'é sira bele kumpriende diak liu tan servisu autór tribunál nomós ajente prosesusal sira iha prosesu ida nia laran.

Aleinde sesaun konabá asuntu ligadu ho enkuadramentu juridika iha sistema kriminal nian, treinamentu ne'e mos disponivel partisipantes sira atu hatene mos prosesu lejislativu in-jeral. Durante diskusaun laran, partisipante balun, preokupa konabá prosesu lejislativu ne'ebé lao iha Parlamentu Nasionál ka Konsellu Ministru. Tuir sira katak sira iha koñesimentu ne'ebé limitadu iha aspeitu lejislativu nian. Tanbá ne'e, JSMP sei kontinua hala'ó treinamentu iha area rurais sira atu povu bele kumpriende diak liu tan konabá prosesu lejislativu liu-liu relasiona ho Lei Kontra Violénsia Doméstika ne'ebé maka sai ona hanesan krime ho natureza krime publiku.

JSMP espera katak ho treinamentu ne'ebé maka hala'ó ona ne'e bele ajuda hodi hasa'e koñesimentu no kapasidade ba partisipantes sira hodi bele ajuda vítima violénsia bázeia ba jéneru hodi asesu ba iha sistema justisa formal no proteze sira nia direitu hirak ne'ebé konsagra ona iha Timór Lésté nia enkuadramentu legal sira iha Timór Lésté.

Atu hetan informasaun kle'an favor kontaktu:
Luis de Oliveira Sampaio
Direitor Ezekutivu JSMP
Email; Luis@jsmp.minihub.org
Landline; 3323883/7295795